



PARTII INUIT INATSISARTUNI

17-10-2013

UKA 2013/129

Pisortat illuutaat A/S Ini-miit aqunneqartut suli imermut attaveqanngitsut tamarmik attavilersorneqarnissaasa pilersarusiornissaa siunertaralugu Naalackersuisut suliassamik piareersaasioqqullugit peqquneqarnissaannik Inatsisartut aalajangiiffigisassaattut siunnersuut
(Inatsisartuni ilaasortaq Doris Jakobsen, Siumut)

Oqaaseqartoq:

(Inatsisartunut ilaasortaq Randi Broberg Partii Inuit)

Inatsisartuni ilaasortaq Doris Jakobsen, Siumut siunnersuuteqarpoq Illuutit A/S INI-mit pigineqartut imermuqarnermut suli attavilersorneqarsimannngitsut attavilersorneqarnissaannik Naalackersuisut peqquneqarnissaannik siunnersuuteqarluni.

Siunnersuut kiisalu Naalackersuisut akissuteqaataat sukumiisumik tusareerlugit Partii Inuit imaattumik oqaaseqaateqassaagut.

Partii Inuit isumaqarpoq maannakkut sumiikkaluaruttaluunniit angerlarsimaffeqariaaserput, tassalu illoqarfinniikkutta nunaqarfinniikkuttaluunniit iluittuunerusumik nalilersuiffigeqqittariaqaripput. Tasaalu Nunatsinni oqartussaasut Kommunellu peqatigiillutik angerlarsimaffeqariaaseq (iluitsaq) peqqissutsimut sumiiffigisamullu naleqquttumik tamanullu peqqinnarnerusoq qanoq ittoq pilersinniarnarlutigu nalilersuillutalu pilersarusiorfigisariaqaripput.

Suli maannamut angerlarsimaffippassuaqarpoq illutamikkut akuersaaruminaalluinnartumik peqqinnanngittorujussuarmillu inissisimasunik, tassalu illorpassuaqalersimavoq nutaanngililluinnarsimasunik, taamaattorli suli inumminnit naammagittaquisunit najorneqartunik. Aamma A/S INI-mit pigineqartuni.

Sumut iluaqutaassagami imermut aqputaa kisiat iluarsaakkutsigu? illutaatalu isaasalerlugu (peqqinnanngeqisup) iluarsaannissaa pinnagu?

Ilisimaqqissaarparput angerlarsimaffippassuaqartoq nutaanngilisoorsimaneq pissutigalugu oqummik annertuumik innarlerneqarsimasunik, taamaattorli inumminnit naammagittaqalutik najorneqartunik. Kiisalu aamma innallagissat aqputaasa pitsaanngittumik inissisimaneq aammalu illut kuuffeqarniarnerisa pitsaanngitsumik suliarineqartarnerisa kingunerisaanik avatagiisitsinnut annertuumik migutsitsisunik amerlavallaanik illuuteqartoqartoq.

Anartarfeqarnikkut eqqaaveqarnikkullu pissutit aamma ilugersunartumiipput suli.

Taamaattumik Partii Inuit isumaqarpugut siunnersuuteqartup siunnersuutaa immini ajunngikkaluarluni taamatut isikkoqartiinnarlugu malinneqassappat ilaannakuusumik pilersarusiorluagaanngitsumillu iliortoqassasoq.

Angerlarsimaffiit tamarmik imermik pilersorneqarnermikkut pitsaasumik inissisimanissaat pingaartittorujussuarput, aammali angerlarsimaffeqariaaserput nutaanerusumik (iluittuunerusumillu) pilersaarusiortariaqarpoq. Ulluinnarni inuuniarnikkut avatagiisaasut atugassarititai tamaasa ilanngullugit.

Tamanna imermik aqqusiinissamik aaliagiisoqarnerinnaatigut anguneqarsinnaanngilaq, suliassap pitsaasumik naammassineqarnissaa silatusaartumik anguniarneqartariaqarpoq.

Partii Inuit pingaartittorujussuarput angerlarsimaffeqariaaserput ullumikkornit pitsaanerusariaqartoq, pingaartumik illoqarfinni nunaqarfinnilu isorliunerusuniittuni. Taamaattumik manna periarfissaq iluatsillugu Kommunit Namminersorlutillu Oqartussat kaammattorumavagut tamatumunnga sukumiisumik ullumikkornit pitsaanerungaartumik pineqartut peqatigilluinnarlugit anguniagaqartoqarnissaanik suliaqaqqullugit.

Naggataatigut aperissaanga; nunatsinni sumiikkaluaraanniluunniit angerlarsimaffeqariaaseq peqqinnarnerusoq qanoq ittoq naleqquppa? Siunnersuuteqartup Inatsisartuni ilaasortap Siumumeersup Doris Jokobsen-nip siunnersuutaanut qujalluta oqaatigissavarput taamatut isikkoqartiinnarlugu akuersaarsinnaannginnatta. Naalakkersuisulli aqqissutissatut siunnersuutaattut iluseqartillugu Sanaartornermut ataatsimiisitaliamut sukumiisumik suliarineqartussanngorlugu ingerlateqqinneqarnissaanut tapersiuteqassagatta.

Qujanaq